

**SSIG Pemangkin Tingkatkan Perkongsian Pengalaman Negara-Negara Selatan
Bernama
07 November, 2012**

PETALING JAYA, 7 Nov (Bernama) -- Gerbang Maklumat Selatan-Selatan (SSIG) diharapkan menjadi pemangkin untuk meningkatkan perkongsian pengalaman, pengetahuan dan kemahiran dalam menghadapi cabaran globalisasi dalam kalangan negara-negara Selatan.

Ketua Setiausaha Kementerian Penerangan Komunikasi dan Kebudayaan Datuk Seri Kamaruddin Siaraf berkata SSIG, yang menjadi pusat simpanan maklumat, memerlukan maklumat yang dinilai tambah, secara terus daripada program bual bicara sama ada yang dirakam atau disiarkan secara langsung. Katanya input pastinya memberi manfaat kepada negara-negara Selatan dalam berkongsi maklumat yang diterima baik oleh audien portal SSIG.

"Menerusi SSIG, kita berharap dapat memberitahu dunia, terutama rakan-rakan negara Selatan, tentang apa yang berlaku di setiap negara masing-masing, aspirasi dan proses pembangunan, kebudayaan dan tradisi kita," katanya semasa merasmikan Perbincangan Meja Bulat SSIG bersama Rakan Kongsi Pintar di sini hari ini.

Teks ucapan beliau dibacakan oleh Timbalan Ketua Setiausaha kementerian, Datuk Dr Rothiah Omar.

Kamaruddin berharap suatu hari, perbincangan meja bulat itu akan membolehkan mereka mendapat kerjasama dan manfaat jauh melebihi apa yang boleh dikongsi, dalam kalangan negara-negara Selatan.

SSIG kini mempunyai 32 rakan kongsi pintar dari Kenya, Argentina, Zimbabwe, Iran, Albania dan Cuba.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=707670>